



# Pemasangan LiSA di pusat rekreasi bantu percepat operasi menyelamat

Oleh [Zuliaty Zulkiffli](#) - September 4, 2022 @ 9:31am  
[bhnews@bh.com.my](mailto:bhnews@bh.com.my)

JITRA: Beberapa lokasi pusat rekreasi membabitkan aktiviti air di negara ini yang menjadi tumpuan awam sedang dikenal pasti untuk dipasang peti peralatan keselamatan Life Saving Appliance (LiSA) bagi memudahkan penyelamatan jika berlaku kejadian lemas.

Timbalan Ketua Pengarah (Operasi), Jabatan Bomba dan Penyelamat Malaysia (JBPM), Datuk Abdul Wahab Mat Yasin, berkata lokasi tumpuan itu membabitkan tasik, pantai dan sungai yang kerap menjadi tumpuan, terutama ketika musim cuti persekolahan.

Beliau berkata, LiSA adalah projek inovasi yang diperkenalkan oleh JBPM sejak tahun 2019 dan sedang diperluaskan di seluruh negara ini.

"Di Kedah, sudah ada dua lokasi yang dipasang LiSA iaitu satu di Pantai Cenang, Langkawi manakala satu lagi di Taman Tasik Jitra yang baru dilancarkan hari ini (semalam).

"LiSA hanya perlu dipasang di lokasi berisiko dan secara automatik akan mengeluarkan bunyi amaran, selain pada masa sama menghantar Navigator Global Positioning System (GPS) kepada balai bomba berhampiran.

"Lokasi GPS ini boleh dikenal pasti menerusi Google Maps dan bomba boleh memberi respon di lokasi yang tepat," katanya ketika ditemui pada Majlis Keselamatan Kempen Penyelamatan Di Air di Taman Tasik Jitra, di sini, semalam.

Hadir sama, Pengarah JBPM Kedah, Penolong Kanan Pesuruhjaya Bomba Sayani Saidon dan Penyelaras Dewan Undangan Negeri (DUN) Jitra, Datuk Aminuddin Omar.

Pada program itu, seramai 134 orang termasuk sebahagian besar penuntut dari lima institut pengajian tinggi (IPT) dan Majlis Belia Daerah di daerah ini terbabit dalam latihan penyelamatan di air.

Mereka didedahkan kursus asas keselamatan di air, peraturan ketika berada dalam air dan keselamatan sewaktu melakukan aktiviti di air dengan bantuan pegawai dan anggota dari Pasukan Penyelamat Di Air (PPDA) JBPM Kedah.

Abdul Wahab percaya dengan pemasangan LiSA di Taman Tasik Darul Aman ini dapat memberi kemudahan kepada orang awam untuk memberi bantuan sekiranya berlaku kes lemas di air dengan cepat.

Dalam pada itu, beliau turut menasihatkan orang ramai supaya tidak mengunjungi kawasan air terjun ketika hujan lebat kerana bimbang risiko berlaku kepala air.

Katanya, orang ramai perlu beredara dengan segera sekiranya menyedari ada tandanya kepala air berlaku di kawasan rekreasi sama ada di bukit, gunung atau sungai bagi mengelak terperangkap dalam arus deras.

"Kebelakangan ini banyak kejadian kepala air di kawasan air terjun seperti yang berlaku di dua lokasi di Kedah iaitu Titi Hayun di Yan, tahun lalu dan Kampung Iboi di Baling pada 4 Julai lalu serta yang terbaru di Lata Ulu Kasar, Lata Payung, Terengganu, kelmarin.

"Antara tanda akan berlaku fenomena itu adalah awan gelap di atas bukit atau gunung, terdapat deruman kuat dari atas kawasan itu serta aliran air yang bercampur dengan daun kering dan ranting kayu serta air berubah menjadi keruh," katanya.

Dalam perkembangan lain, Abdul Wahab berkata, seramai 14,500 pegawai dan anggota JBPM di negara ini sedang bersiap sedia untuk menghadapi musim tengkujuh.

Selain itu, katanya, 2,000 pegawai Bomba Bantuan (PBB) yang dibayar elauan akan digerakkan mengikut syif untuk menangani musim tengkujuh yang boleh mengakibatkan banjir.



Timbalan Ketua Pengarah (Operasi) JBPM, Datuk Abdul Wahab Mat Yasin (dua dari kiri) melihat peralatan yang ada dalam peti peralatan keselamatan Life Saving Appliance (LiSA) yang diletakkan di Taman Tasik Darul Aman untuk memudahkan operasi penyelamatan jika berlaku kemalangan di air. NSTP/Zuliaty Zulkifli